

1 Timoteo

1 Pablohájpøch høøch. Ja'a Jesucristøch xquiuguexyhajp. Ja'a Diosteedy møødä Wiindsøn Jesucristo, mänítøch hajxy tøø xyhane'emy cooçh jaduhñ ndúnät cuguexy. Ja'a Dios hajxy jaduhñ xyajnáhwaats xyajcuhwáatsäm. Ja'a Jesucristo hajxy njøbhíjxäm coo hajxy hawa'adstuum xpíada'agáanäm.

²Timoteo, míiçhhøch hádaa nocy nyajnájaayøøby. Jadúhñhøch miíçh njjuø'øy nebiä hamdsoo huungpän coo ja'a Diosmädia'agy nmäbøjcäm. Tøyhajt jaduhñ. Ja'a Diosteedy møødä Wiindsøn Jesucristo, ween miíçhä tsooctä mayhajt hajxy xtiuuñä, ween xñäxuuçh, weenä hoyhajtä weenhajt xmio'oy.

³Hoorä, mänaa højts jim tøø nhíjtäm Efeso, mänítøch nwiinmahñdyhajty cooçh jim nnøcxät Macedonia-naaxooty. Mänítøch miíçh nmänuu'xtaacy coo jim mmähmø'øwät Efeso nidiuhñ, coo jaduhñ jim ween mduñ wiindsøn maa ja'a Diostøjcän. Jadúhñhøch miíçh cham nnämáaguiumbä coo jim mjaac túnät. Hix, jii jäya'ayhajxy näje'e, cabä Diosmädia'agy hajxy hoy yajnáhixø'øy neby højts

nyajnáhixø'øyyäm. Wiingaty hajxy yajnáhixø'øy. Mhójäp jaduhñ coo hajxy jaduhñ wiing quia'a yajnáhixø'ønät.

⁴Jaanä jaduhñduhmbä, mhójäp je'ebä pønjetiä nähap hajxy wi'i miädiaacp, møød pønjaty yajcopcøøby tijatiä jecyjiäya'ayhajxy hijty xiøhaty. Cab jaduhñ choobaady coo jaduhmbä capxy coo jaduhmbä mädia'agy hajxy tehngajnä yajcapxiø'øy. Jue'e tsoobaatp coo ja'a Diosmädia'agy hajxy nmäbøjcäm coo ja'a Dios hajxy xpíadäacäm hawa'adstuum.

⁵Pero jaduhñä Dios jioot chocy coo hajxy hamuumdu'joot nniçhojc nnibia'häyóowämät hamiñ haxøpy. Pønjaty howyiinmahñdy møød, je'ehajxy jaduhñ hamuumdu'joot niçhojc nibia'häyóowäp, møød pønjaty haxøøgwiinmahñdy ca'a møød, møød pønjetiä Diosmädia'agy hamuumdu'joot mähøjp.

⁶Tøø jäya'ayä Diosmädia'agy hajxy ñajtshixøøñä näje'e. Tøø hajxy jaduhñ tiu'udägoonä. Xiøøbä hajxy yajcapxiø'øy mädyii ca'a tsoobaatp.

⁷Jaduhñä jioot hajxy jia wi'i piäda'agy coo ja'a jecyquiuhdujt hajxy yajnáhixø'øwät, ja'a Moisés

jecy quiujáhyyäbä. Pero cab hajxy wyiinjuø'oy neby hajxy jia wi'i yajñähixø'owa'añ cooc tyijy tiøyyä.

⁸Coo ja'a jecyquihdujt hajxy jaduhñ hoy nyajtúunämät, mänit jaduhñ tiuungpaady. Tøyhajt jaduhñ, túhmäts. ⁹Paadiä Dios ja'a jecyquihdujt piädaacy coo ja'a haxøøgjäya'ayhajxy jaduhñ quiumädówät, ca'a jie'eguiøxpä ja'a hojiäya'ayhajxy. Tøyhajt jaduhñ, túhmäts. Jue'eçh jaduhñ nnänøømby ja'a haxøøgjäya'ayhajxy, pønhatiä Diosmädia'agy ca'a mábøjp, møød pønhatiä Dios ca'a wiingudsähgøøby, møødä cubojpä cugädieebiähajxy, møød pønhatiä haxøøgwiinmahñdy møød, møød pønhatiä Dios mägapxtägooby, møød pønhatiä tiaj tieedy yagho'p, møødä jäya'ay-yagho'pähajxy, ¹⁰møød pønhatiä wiingto'oxiøjc møødtsänaaby, møød pønhatiä miäya'adiøjc møødmaab, møødä jäya'amiee'tspähajxy, møødä hønndaacpähajxy, møødä mänähøønøøbiähajxy, møød pønhatiä hoguiapxiä homiädia'agy hajxy ca'a cudiumb. ¹¹Hädaa hoguiapxy hädaa homiädia'agy hädaaduhmbä, jim jaduhñ myiñ cujaay maa ja'a Diosmädia'aguiän coo ja'a Dios hajxy tøø xpiädaacäm hawa'adstuum. Diøshøch jaduhñ tøø xyajñähdiy coo ja'a miädia'agy nyajwá'xät. Jaançh tehñ jiootcujcä Dios jaduhñ.

¹²Haa ja'a Wiindsón Jesucristo, je'eçhä mäjaa tøø xmio'oy. Páadyhøch jaduhñ nnäma'ay “Dioscujú'uyäp” cooçh tøø xwyiinguexy cooçhä miädia'agy jaduhñ nyajwá'xät.

Xyaghijxnájxhøch jaduhñ cooçh hänäjty hoy nduna'añ, ¹³hóyhøch hijty haxøøg nja wiingapxety. Nmädsibøøbiøch hijty. Nhøxpäbøobiøch hijty pønhatiä mábøjp ja'a Jesucristocøxpä. Pero cábøçhä Dios xyajcumädooyy. Xñäxúu'tshøch jaduhñ je'eguiøxp cooçh hänäjty nga'a nnajuø'oyñä cooçh hänäjty haxøøg njatcø'oy. ¹⁴Mänitøçhä Dios ja'a tsooctä mayhajt møj may xtiunñä. Mänitøch xpiädaacy tu'ugmädia'agy møødä Jesucristo. Páadyhøçhä Diosmädia'agy nmábøjnä. Páadyhøçhä jäya'ay nägøxiä ndsojc nba'häyoonä.

¹⁵Paadiä Jesucristo yaa yhooyy hädaa yaabä naaxwiin, ja'a cubojpä ja'a cugädieebiähajxy hoy yajñähwa'açh yajcuhwa'açhii. Tehñ tiøyhajt jaduhñ. Tsøc hajxy hamuumdu'joot mábøjcäm. Høøch, hanáxiøçhä pojpä cädieey hijty nmøødä may. Cab ndijy pøn hijty xmiäbaady nébiøçhä pojpä cädieey hijty nmøødä. ¹⁶Hóyhøçhä pojpä cädieey hijty may nja møødä hanaxiä, mänitøçhä Dios xñäxuu'ch, jaduhñä Jesucristo yajcähxø'cy cooçh hänäjty xjiaançh tehñ miee'xtucy, weenä cubojpä cugädieebiähajxy jaduhñ wyiinjuø'oy coo hajxy hawiinmats miäbøgät ja'a Diosmädia'agy ja'a Jesucristocøxpä, møød ween hajxy jaduhñ wyiinjuøøbiä coo hajxy hoy jiugyhada'añ cøjxta'axiøø nebiä Dios jiugyhatiän. ¹⁷Tsøgä Dios hajxy hoy miänaajä wiingudsähgøøyyäm. Nidiuhñ jaduhñ miähane'emy cøjxta'axiøø. Cab jaduhñ mänaa yho'oga'añ tiägoyya'añ. Cab hajxy

jaduhñ mänaa nhíjxám. Tehm tiøyhajt jaduhñ.

¹⁸⁻¹⁹Huung Timoteo, chámhøch miičh nwiingapx njøjcapxø'øy coo ja'a Diosmädia'agy hamuumdu'joot mmämøjtänä'awät, møød coo tehngajnä mmäbøgät, møød coo hojioot howyiinmahñdy mjaac panøcxät. Jaduhñ miičhä Dioscugapxyhajxy jecy tøø xyhuuc mädiaacpä coo miičh jaduhñ mgudiuna'añ. Najtscapxøøyyä hajxy jaduhñ ja'a Dioshespíritu. Jii jäya'ayhajxy näje'e, coo ja'a yhojiootä yhowyiinmahñdy hajxy tøø ñajtshixø'øy, paady hajxy tøø tiu'udägooñä. Cabä Diosmädia'agy hajxy miäbøjnä. ²⁰Jaduhñä Himeneohajxy tøø jiaty møødä Alejandro. Tøøčhä møjcu'ugong hajxy nyajcø'ødägø'øy, weenä Dios hajxy jaduhñ miänuu'xta'agy coo hajxy miämee'xøøjät, møød coo hajxy ween wyiinjuø'øy coo jaduhñ yhaxøögä coo ja'a Dios hajxy ñähojy.

2 Hoorä, chámhøch nyajwiinxiic nyajwiingapxø'øwa'añ nebiatiä Dios hajxy nba'yaaxmúcämät. Tsøgä Dios hajxy mänuu'xtáacäm ja'a jäya'aguixøpähajxy nägøxiä mäduhñtiä hajxy yaa chäna'ay hädaa yaabä naaxwiin. Tsøgä Dios hajxy nämáayyäm “Dioscujú'uyäp.” ²Pønjaty hajxy xyhanéhñäm, je'eguiøxpä Dios hajxy tsøc mänuu'xtáacäm, møødä gobiernähajxy, møødä gobernadorhajxy, møødä cuduunghajxy. Jaduhñ hajxy hagujc jootcujc nhíjtämät. Jaduhñä cu'ug hajxy xquia'a hadsíjpämät. Jaduhñä Diosmädia'agy hajxy

hoy ngudiúunämät. Jaduhñä Dios hajxy hoy nwiingudsähgøøyyämät. ³Hahixøøby jaduhñ coo ja'a Dios hajxy jaduhñ nmänuu'xtáacämät ja'a gobiernäcxøpähajxy. Jaduhñä Dios hajxy xquiumáayyämät. Jaaya'ay hajxy jaduhñ xyajnahwaats xyajcuhwáatsäm. ⁴Jaduhñä Dios jioot chocy coo hajxy nägøxiä nnähwaats nguhwáatsämät mäduhñtia hajxy yaa ndsänáayyäm hädaa yaabä naaxwiin, møød coo ja'a tøyhajt hajxy nwiinjuøøyyämät ja'a Jesucristocøxpä. ⁵⁻⁶Hix, tu'uquiä Dios hajxy nDeedyhájtäm. Jaanä jaduhñduhmbä, tu'jäya'ay hajxy jim xñähgapxtúutäm Dioswiinduum. Ja'a Jesucristo je'e. Mänitä Dios miänaañ coo ja'a Jesucristo yaa jäya'ayhädat hädaa yaabä naaxwiin. Mänitä Jesucristo hamdsoojoot ñiñähdujcä. Mänit hajxy nägøxiä hoy xñähho'túutäm. Jaduhñ nbojpä ngädieey hajxy nägøxiä xyajnahwaats xyajcuhwáatsäm. ⁷Páadyhøchä Dios xpiädaacy coöch xquiuguexyhädät coöchä mädia'agy jaduhñ nyajwá'xät coo ja'a Jesucristo hajxy tøø xñähho'túutäm, møød coöchä jäya'ayä Diosmädia'agy nyajwiingapxø'øwät, ja'a hajxy ca'a judiospä, ween hajxy jaduhñ miäböcy, møød weenä tøyhajt hajxy jaduhñ wyiinjuø'øy. Tømiädiäacpøch jaduhñ, cábøch nhøhñda'agy.

⁸Jaduhñds je'e, jaduhñhøchä njoot chocy coöchä nmäya'adiøjcä Dios hajxy pia'yá'axät, hoy ñä'a majatiä hajxy mhamugø'øy Dioswiingudsähgøøbiä. Hojioot howyiinmahñdymøød hajxy

jaduhñ mba'yá'axät, ca'a yhadsip ca'a yhajootma'adä, ca'a yhaxøøgwiinmahñdymøødä.

⁹Jaanaä jaduhñduhmbä, cábøchä njoot chocy coo ja'a to'oxiøjc-hajxy hočhädiuunnä ñibiada'agøøjät.

Cabä quiuhwaay hajxy hanaxiä yajcøpcø'owät. Cabä oro hajxy piädá'agät ni perlas. Cabä wit tsojaty pä hajxy miäwädítät.

¹⁰Jaduhñä joot hajxy piädá'agät coo ja'a mayhajt hajxy tehngajnä tiúnät, jaduhñ hajxy yajcähxø'ogät coo ja'a Dios hajxy tøyhajt wyiingudsähgø'øy hamuumdu'joot.

¹¹Hamoñ haducy ja'a to'oxiøjc-hajxy jim yhamädoowhídät maa hajxy naxy mhamugø'øyän. Jaduhñä Diosmädia'agy hajxy hoy yhabøgät.

Møød mee'xxieemy hajxy jim yhidät. ¹²Jaduhñhöch nmägäp nhanehmbä coo ja'a to'oxiøjcä Diosmädia'agy hajxy jim quia'a yajnahixø'owät maa hajxy naxy mhamugø'øyän. Hamoñ haducy hajxy jim ñä'ägä hídät. Cabä to'oxiøjc cuhdujt hajxy miøødä coo ja'a ya'adiøjc hajxy yhoj yá'axät.

¹³Hix, ja'a Adán, jawyiin je'e yhädiuunnä; høxhaamä Eva jiaac hädiuunnä. ¹⁴Jaanaä jaduhñduhmbä, ja'a Eva jaduhñ wiinhøhnä ja'a mõjcu'ugong, ca'a yhadängä. Jaduhñä Eva quiädiehčohñ.

¹⁵Paadiä to'oxiøjc-hajxy jiaanč tehñ chaačhpøcy coo yhuunghajxy myiñ miech. Pero coo ja'a Dios ja'a miädia'agy hajxy tehngajnä miäbøjcät, jaduhñä piojpä quiädieey hajxy yajnahwa'ads yajcuhwa'adsaanäxä. Jaduhñä Dios chojpä coo ja'a to'oxiøjcä mäbøjpädøjc hajxy hamuumdu'joot

choc pia'häyowät, møød coo hojioot howyiinmahñdy hajxy miøødhádät, møød coo hajxy mee'xxieemy yhidät.

3 Hahixøøby jaduhñ coo ja'a mjoot hajxy mbädá'agät coo hajxy mdúnät wiindsøn maa ja'a mäbøjpädøjc-hajxiän. Hodiung jaduhñ. Tehñ tiøyhajt jaduhñ. ²Pøñ jaduhñ tuumb wiindsøn maa ja'a Diostøjcän, tsipcøxpä howyiinmahñdy miøødhádät. Jagooyä to'oxiøjc tu'ug yaghídät, ca'a mietsc ca'a tiägøøgä. Cabä vino comjaty yhú'ugät. Cabä haxøøgwiinmahñdy miøødhádät. Hoy wiädítät. Coo pøñ miésät tøghayohbiä maa ja'a tiøjcän, piu'umió'owäp quioñdymó'owäp jaduhñ. Jiädäp yajnahixø'ow jaduhñ. ³Cab yhu'ug cab jiøø'xät. Cab chiptúnät. Mee'xxieemy jaduhñ quiapx miädiá'agät. Cab tii yajtsiptá'agät. Cabä xädø'øn yhadsógät. ⁴Pøñ jaduhñ tuumb wiindsøn maa ja'a Diostøjcän, tsipcøxpä yhuungä tio'oxy hoy miägäp xhané'emät, weenä yhuunghajxy miädia'agymiäbøcy, ween wyiingudsähgø'øyii ja'a yhuung. ⁵Hix, pønä yhamdsoo huungä yhamdsoo to'oxy hoy ca'a hane'emaamb, cab hoy miähane'ema'añ maa ja'a Diostøjcän. ⁶Cab jaduhñ yhahixø'øy coo ja'a naamdägø'øbä tiúnät wiindsøn maa ja'a Diostøjcän, coo jaduhñ ñä'a niguiumayøøjät. Wehñä jaduhñ quiumädówät nebiä mõjcu'ugong quiumädooyän. ⁷Pøñ jaduhñ tuumb wiindsøn maa ja'a Diostøjcän, tsipcøxp jaduhñ hoy wiädítät maa jäya'ayhagujcän, ja'a

hajxy ca'a Diosmädia'agymiäbøjpä. Jaduhñ quia'a nähøjøjät, jaduhñ quia'a yajtu'udägoyyøjät ja'a möjcu'ugong.

⁸Jaanä jaduhñduhmbä, ja'a ya'adiøjc-hajxy jim mäbuhbejpä maa ja'a Diostøjcän, tsipcøxp hajxy hoy jiäya'ayhädät. Cab hajxy ñä'ä metscapx ñä'ä tägøøgcápät. Cab hajxy yhu'ug cab hajxy jiøø'xät. Cabä jäya'axiädø'õñ hajxy yhadsógät. ⁹Tsipcøxpä tøyhajt hajxy miäbøgät ja'a Jesucristocøxpä, ja'a hijty cuyu'u'chpä. Howyiinmahñdymøød hajxy jaduhñ miäbøgät. ¹⁰Pønñatiä jioot tsojp coo hajxy miäbuhbédät maa ja'a Diostøjcän, cab hajxy mdsoj pädá'agät. Ween hajxy jayøjp mhuuc hijxmach pø hoy hajxy hänäjty tiuna'añ. Coö hajxy hänäjty tøø mhijxmach coo howyiinmahñdy hajxy jiaançh møødä, mänit hajxy mbädá'agät coo hajxy jaduhñ miäbuhbédät. ¹¹Jaanä jaduhñä to'oxiøjc-hajxypä, ja'a hajxy jim mäbuhbejpä maa ja'a tsajtøjcän. tsipcøxp hajxy hoy jiäya'ayhájpat. Cab hajxy pøn ñähøønø'øwät. Cab hajxy yhu'ug cab hajxy jiøø'xät. Hamuumdu'jootä hoybä weenbä hajxy quiudiúnät cøxiä. ¹²Hoorä, ja'a mäbuhbejpädøjc-hajxy, ja'a ya'adiøjc-hajxypä, jagooyyä to'oxiøjc hajxy tu'ug yaghídät. Hoy ja'a yhuungä tio'oxy hajxy miägäp xhané'emät. ¹³Ja'a mäbuhbejpädøjc-hajxy jaduhñ hoy tuumbä, cumayáanäp hajxy jaduhñ ja'a mäbøjpädøjc, møød jaduhñä möjjuøhñdy hajxy miøødhädät coo hajxy hänäjty miädia'aga'añ coog hajxy miäbøcy ja'a Jesucristocøxpä.

¹⁴⁻¹⁵Jaduhñhøchä njoot jia tsoey cooçh jim mobädajpä nnøcxät maa miichän. Pero cooçh jaduhñ jim nga'a nä'ä tsoj nõcxät, päadyhøch hädaa nocy nyajnäjaayø'øy, jaduhñ mnajuø'owät nebiä mäbøjpädøjc-hajxy jim hoy yhidät maa ja'a Diostøjcän. Hoy miänaajä Dios yhity. Hoy miänaajä Dios ja'a mäbøjpädøjca tøyhajt yajnähixø'øy ja'a Jesucristocøxpä. Hamuumdu'joot hajxy jaduhñ ñäwa'añii. ¹⁶Jaançh tehñ miøj jaançh tehñ jiaançh hädaa mädia'agy jaduhñ ja'a Jesucristocøxpä, coo hajxy hoy xyajnähwaats xyajcuhwäätsäm. Tehñ tiøyhajt jaduhñ. Cuyu'u'chä Dios hädaa mädia'agy hijty yaghity. Mänit hajxy jaduhñ tøø xyajwiinjuøøyyäm. Hoorä, coo ja'a Dios jaduhñ miänaañ, mänitä yHuung yaa quiejxy hädaa yaabä naaxwiin. Ja'a Jesucristo je'e. Jaduhñ je'e jiäya'ayhajty neby højtshájtäm. Mänitä Dioshespíritu jaduhñ yajcähxø'cy coo ja'a Jesucristo yhity hawa'adstuum. Mänitä Jesucristo yhijxä ja'a Diosmoonsä, ja'a hajxy jim tsohmbä tsajpootyp. Mänitä Jesucristo jim ñøcxy tsajpootyp. Mänitä mädia'agy wia'xy ja'a Jesucristocøxpä maa ja'a jäya'ayhajxy chäna'ayän, ja'a ca'a judíoshajxypä. Mänitä jäya'ayhajxy yaa may miäbøjcy ja'a Jesucristocøxpä hädaa yaabä naaxwiin.

4 ¹⁻²Hoorä, howyiinjuøøñä ja'a Dioshespíritu tøø miäna'añ coogä mäwiinhøhmbähajxy piädø'øga'añ. Jaduhñäc hajxy ñibiäda'aga'añii nebiä hoyhäna'cän.

Pero yhamdsoo cuhdújtác hajxy yajtunaamby. Haxøøgcuhdújtác hajxy miøødhadaamby møødä haxøøgjuøhñdy. Jadúhñägä mäwiinhøhmbähajxy yajtägø'owa'añii ja'a møjcu'u. Jadúhñác hajxy ñajtscapxø'øwáanäxä nébiägä høhnda'agymiädia'agy hajxy yajnahixó'owät. Mänítägä mabøjpädøjcä høhnda'agymiädia'agy hajxy nämay yhamädoowhida'añ. Mänítác hajxy jaduhñ miäbøga'añ. Mänítägä tømíädia'agy ja'a Jesucristocøxpä hajxy ñajtshixø'owa'añ.

³⁻⁴Jadúhñägä mäwiinhøhmbähajxy hánajty yhøhnda'aga'añ cooc tyijy yhaxøøgä coo hajxy nbøjcämät, møød cooc tyijy quia'a hahixø'øy coo hajxy cøxiä wiinä njøø'xämät, hoy ja'a Dios cøxiä wiinä tøø jia päda'agy. Hix, tijatiä Dios tøø piäda'agy, haagä hoy je'e. Hahixøøby jaduhñ coo hajxy nguhbøjcämät, pønjetiä tøyhajt mabøjp ja'a Jesucristocøxpä. Cooc hajxy jaduhñ nguhbøjcäm, jaduhñä Dios hajxy nnämáayyämät “Dioscujú'uyäp.” Y cab jaduhñ yahixø'øy coo hajxy nwiingápxämät. ⁵Coo ja'a Dios jaduhñ tøø miäna'añ, møød coo ja'a Dios hajxy nba'yáaxäm, jaduhñä Dios cøxiä wiinä quiunuu'xy.

⁶Naxy miichä mabøjpädøjc jaduhñ mdehñ ñajtscapxø'owät nébiøch cham nmädia'aguiän, jaduhñä Jesucristo hoy mbuhbédät, jaduhñä homiädia'agy hoy mjaac habøgät ja'a Jesucristocøxpä, ja'a hajxy nmabøjcämbä. Je'e miich mnä'ägä panøcxyhajpy.

⁷Cabä nähapmädia'agy myajcopcø'owät nebiä teedyhaphajxy wyl'i miädia'aguiän. Høhnda'agymiädia'agy je'e jaduhñ. Jimä mjoot mnä'ägä pädá'agät nebiä Diosmädia'agy maas hoy mjaac panøcxät. ⁸Tsoobaatp jaduhñ siémpräm coo nni'xä ngopc hajxy møc nyaghíjtämät. Pero maas nä'ägädä tsoobaatp coo ja'a Diosmädia'agy hajxy tehngajnä nbanøcxämät. Hix, coo hajxy jaduhñ hoy ngudiúunämät, jaduhñä Dios hajxy tøø xyajwiinwaanøøyyäm coo hajxy hodium xyaghidáanäm hoy miänaajä, møød jäda'ahaty, møød miimnä mejtsnä. Jaduhñ hajxy xyagjugyhadáanäm cøjxta'axiøø neby je'e juyghatiän. ⁹Tehñ tiøyhajt hädaa mädia'agy jaduhñ. Tsøg hajxy hamuumdu'joot mabøjcäm. ¹⁰Coo ja'a Dios hajxy jaduhñ xyaghidáanäm hodium hoy miänaajä, paady hajxy møc nduun nxájjäm. Jujquiä Dios. Cooc ja'a miädia'agy hajxy nmabøjcäm coo ja'a Jesucristo ja'a jäya'ay nägøxiä tøø ñähho'tu'udy, paady hajxy xyajnahwa'ads xyajcuhwa'adsáanäm.

¹¹Jaduhñä mabøjpädøjc mwiingapx møjcapxø'owät nébiøch naamnä tøø nmädia'aguiän. ¹²Tehngajnä hoguiuhdujt myaghídät, jaduhñ pøn xquia'a péxät, hoy jomøjt may mga'a ja møødä; møød jaduhñä mabøjpädøjc xpiahíxät. Hoy yajxón mgapx mmädiä'agät. Caj mänaa mgapxtägøyyät. Hoy piønä mdsoc mba'häyówät. Hoy ja'a Diosmädia'agy mmabøgät. Mmøødhádäbä howyiinmahñdy.

¹³Mädúhñtiøch jim nga'a tsoj nõcxy maa miichän, tehngajnä Diosmädia'agy mgapx mmädiá'agät coo hajxy jim naxy mhamugø'øy maa ja'a Diostøjcän. Jaduhñä mabøjpädøjc myajwiinxiic myajwiingapxø'owät.

¹⁴Mänaa miichä majjäya'adiøjc jim xquiø'onähgapiän maa ja'a Diostøjcän, mänit miichä Dioshespíritu xñägapxy cooc miichä Diosmädia'agy myajwa'xa'añ. Mänit miich häna'c jaduhñ xñajtsapxøøyyä. Mänit miichä Dios mäjaa xmioooy coo ja'a miädia'agy jaduhñ myajwá'xät. Naxy mdehm jiahmiejtstá'agät coo ja'a mäjaa jaduhñ xmioooy. Caj mnajtshixø'owät.

¹⁵Jaduhñä mjoot mbädá'agät coo ja'a Diosmädia'agy jaduhñ hamuumduljoot myajwá'xät hoy miänaajä. Coo jaduhñ mgudiún mguñáxät, jaduhñä cu'ug xyhíxät coo jaduhñ hoy myajtu'uyo'oy.

¹⁶Niyajcopcø'owøø nej mwädity, nej myajnáhixø'øy. Tehngajnä jaduhñ mgudiún mguñáxät, jaduhñ mnähwa'ads mguhwá'adsät näguipxy møødä jäya'ayhajxy hamädoowhijpä.

5 Cabä majjäya'adiøjc mhøj myá'axät. Mee'xxieemy mwiiingapx mjøjcaxø'owät nebiä mhamdsoo teediän. Møødä muutsc-häna'c-hajxypä, jaduhñ mmägäpax mhané'emät nebiä mhamdsoo puhya'ayän. ²Jaaná jaduhñä tsø'ødaj mmägäpax mhanéhmbät nebiä mhamdsoo tajjän. Møødä to'oxiøjc-hajxy muutspä, jaduhñ mmägäpax mhanéhmbät nebiä mhamdsoo puhdo'oxiän. Caj mmägäpaxtägøyyät.

³Jii yaamgto'oxyhajxy näje'e, cab hajxy pøn nä'ägädä møødä. Tøyhajt hajxy nidiuhmhaty. Je'eds hajxy mbuhbédäp. ⁴Pero ja'a yaamgto'oxyhajxy jaac jimbä, pø jimä yhuunghajxy, pø jimä yhoc-huunghajxy, ween hajxy jaduhñ piuhbedyii nägøø nädecypiiä ja'a yhamdsoo huunghajxy, ja'a yhamdsoo hoc-huunghajxy. Jaduhñä mabøjpädøjc-hajxy quiumayøøjät ja'a Dios coo tiaj tieedy hajxy jaduhñ piuhbejtägätsät. Jaduhñ hajxy yajcähxø'ögät coo ja'a tiaj tieedy hajxy jiaanč wiingudsähgø'øy. ⁵Hix, ja'a yaamgto'oxyhajxy tehñ tiøyhajt nidiuhmhajpä, ja'a Dios hajxy yhajodhajpy. Xøømdsuhñ hajxy miänuu'xta'agy. ⁶Pero ja'a yaamgto'oxy ja'a Dios hajxy ca'a hajodhajpä, coo ja'a jioot hajxy chögät coo hajxy xyi'ig xioonda'aga'añ, jaduhñä Dios yhixy nebiä ho'ogypiän, hoy hajxy jia jujyñä, hoy hajxy jia tsuxnä. ⁷Jaduhñä mabøjpädøjc mwiingapx mjøjcaxø'owät coo ja'a homiädia'agy hajxy pedyii ween quiuidiun, jaduhñ hajxy quiumayøøjät ja'a cu'ug. ⁸Pønjatiä jiuju miägu'ug ca'a hijxp ca'a mähäyoob møødä yhuung møødä tio'oxy, tøø ja'a Diosmädia'agy hajxy ñajtshixøøñä neby hajxy hijty miäbøquiän ja'a Jesucristocøxpä. Maas haxøøg hajxy jiatcø'øy quejee häna'c-hajxy ca'a nä'ägä mabøjpä.

⁹Mgujáhyyäbä yaamgto'oxiä xiøø hajxy pønjaty hajxy mbuhbedaa'mby. Je'e xiøøhajxy pédäp pønjaty tägøøghii'x jomøjt tøø yhabéjtäxä, møød

pønjatiä ya'adiøjc tu'uquiä tøø miøødtsäna'ay, ¹⁰møød pønjatiä cu'ughajxy nänøømby coo ja'a mayhajt hajxy tøø tiuunäxä, møød pønjatiä nøøxä miajc hoy yajxón tøø yajtso'ogy tøø yajyeegy, møød pønjaty pu'umiooby coñdymooby ja'a jäya'ayhajxy jim miimb mejtspä maa ja'a tiøjcän, møød pønjatiä mäbøjpädøjc cø'øbuyp tecypiujp, møød pønjaty puhbejp ja'a jäya'ayhajxy häyohmbaatpä, møød pønjatiä jioot tøø piäda'agy coo ja'a hoybä weenbä hajxy quiudiün quiuñäxät hoy näl'ä tiijä. Ja'a yaamgto'oxy hädaa hoguiuhdujt jaduhmbä hajxy yajtuumbä, je'eds hajxy mbuhbédäp.

¹¹⁻¹²Pero ja'a yaamgto'oxy tsaanbä muutspähajxy, cabä xiøøhajxy quiujähyyäxät, cab hajxy mbuhbédät. Hoy hajxy tøø jia mäna'añ coogä Jesucristo hajxy hamuumdu'joot miäduna'añ maa ja'a tsajtøjcän, mänitä jioot hajxy näje'e piäda'agy coo hajxy piøjtägatsa'añ coo hajxy yhuuctägatsa'añ. Cabä Jesucristo hajxy jaduhñ hoy miädunaannä. Y tu'udägöyyäp hajxy jaduhñ.

¹³Jaanä jaduhñä yaamgto'oxy tsaanbä muutspä hajxy näje'e jiajpä, wi'i nüuxho'p hajxy, tøjc-tøjc hajxy wiädity. Wi'i miädia'agy-yajnajxp hajxy. Näl'ä yaghadsow näl'ä yajpøgø'øy hajxy cøxiä tøø jiaty. Cøxiä hajxy näl'ä pamädia'agy mädyiijaty ca'a jagä hawiinmats.

¹⁴Jaduhñhøchä njoot jia tsocy coo ja'a yaamgto'oxyhajxy piøjtägätsät, ja'a hajxy tsaanbä muutspä, weenä nøøxä miajc hajxy jaduhñ jiaac yajtso'ogy, weenä jiøønä tiøjc hajxy

hoy yajxón cwieendähaty, jaduhñ hajxy quia'a hoj quia'a ya'axøøjät ja'a miädsiphajxy. ¹⁵Hix, tøø hajxy näje'e tiu'udägooñä. Tøø ja'a mõjcu'ugongä miädia'agy hajxy jiojppøgøyyänä.

¹⁶Mijts, puhdo'oxytiøjc, pø jim mijtsä yaamgto'oxy mmøødä maa ja'a mjujy maa ja'a mmägu'ughajxiän, ween hajxy jaduhñ mbuhbety, jaduhñä mäbøjpädøjc-hajxy quia'a taj quia'a máyät neby hajxy jaduhñ piuhbédät. Hix, jaduhñä mäbøjpädøjca yaamgto'oxy hajxy hoy piuhbédät, ja'a hajxy pøn ca'a jaançh møødpä.

¹⁷Ja'a majjäya'adiøjc-hajxy, ja'a hajxy jim hoy tuumbä wiindsøn maa ja'a Diostøjcän, ween hajxy hoy miäjuyii, møødä Diosmädia'agy hajxy yajnähiøøbiä. Ween hajxy näl'ä tægø'øbä miäjuyii. ¹⁸Hix, jaduhñä Diosmädia'agy miäna'añ: "Maa ja'a weeyä trigo hajxy hänäjty myajtehñdse'ediän, weenä weeyä jaduhñ piuhjøø'xy." Jaanä jaduhñ miänaambä: "Weenä cuduumbä cubøjpä miäjuyii."

¹⁹Coo ja'a Diostøgootypä wiindsøn näl'äxø'øwø'øwøøjät, mänitä mäl'äxøhbä miädia'agy miäbøjcäxät pø jimä capxtøøbä miøødä mejtstägøøg. Pø cab jaduhñ miøødä, cabä miädia'agy jaduhñ miäbøjcäxät. ²⁰Ja'a Diostøgootypä wiindsøn hajxy hoy ca'a wädijpä, mhøjäp my'axäp jaduhñ maa ja'a mäbøjpädøjc-hajxy nägøxiä yhamugø'øyän, weenä miäwiindsøn hajxy jaduhñ chähgø'øy. ²¹Miich nwiingapx njøjcaxpøøby coo hädaa cuhdujt jaduhmbä tsipcøxp mgudiün

mguñáxät. Cabä mmähäna'c nä'ä nägoobä mnä'ä tsaächtiúnät, ni caj nä'ä nägoobä mbuhbédät. Tu'cuhdujtä häna'c mnä'ä híxät, hoy jaduhñ xjia mägu'ughaty, hoy jaduhñ xjia mädsiphaty. Xyhíxäbä Dios jaduhñ mөөдä Jesucristo, mөөдä Diosmoonsähajxy jim tsajpootypä, ja'a hajxy wiimbíyyäbä. ²²Coo pөñ hänäjty tiäg'өwa'añ tuumbä tsajtөjwiindsön, caj mdsoj cө'өнähgábät. Jayөjp mwiinmahñdyhädät hodiägaamby pө hoy hänäjty tiuna'añ, pө caj. Hix, coo jaduhñ ñä'ä tu'udägöyyät, wehñdä miichä cu'ug xñänómät cooc tyijy miich tөө mbuhbety. Howyiinmahñdy myaghídäp hoy miänaajä.

²³Timoteo, naxy miich mjootpäd'өgyii. Hahixөөby coo vino weeñtiä mhú'ugät. Cabä nөөyyähajtiä mhúucnät.

²⁴Jii jäya'ayhajxy näje'le, coo hajxy mänaa quiädieey, paquiä jaduhñ wyiingähx'өgy, cahnä hajxy hänäjty miөjya'axyii hagujc. Pero jii wiinghäna'c-hajxy, cabä piojpä quiädieeyhajxy choj wiingähx'өgy, hөxtä coonä hajxy hänäjty tөө miөjya'axyii hagujc. ²⁵Jaanä jaduhñduhmä, jii jäya'ayhajxy näje'ebä, paquiä jaduhñ wyiingähx'өgy coo hojioot hajxy jiaanč tehñ miөөдä. Hoy jaduhñ quia'ja tsaj wyiingähx'өgy, tsipcөxp cujecy wyiingähx'өga'añ.

6 Mijts mähөjpädөjc, nämay hajxy mhity cudoog'өy. Naxiä mwiindsön hajxy mdehñ wyiingudsähg'өwät. Naxy hajxy jaduhñ mdehñ miädia'agymiäbögät. Hix, coo hajxy jaduhñ hoy mga'a

cudiún mga'a cuñáxät, wehñdä mwiindsön ja'a Dios haxөөг ñänómät mөөдä Diosmädia'agy. ²Jaanä jaduhñduhmä, pөnjatiä wyiindsönä Diosmädia'agy mähөjp, cabä mwiindsön hajxy mbéxät. Pero hamuumdu'joot hajxy mwiingudsähg'өwät. Maas hoy hajxy jaduhñ mmädia'agymiäbögät je'eguiөxp coo ja'a Diosmädia'agy miähөjpä, mөөд coo hajxy mmөөдničhogyii. Naxiä mähөjpädөjc hädaa cuhdujt jaduhñmä mdehñ wyiingapx mdehñ jiojcapx'өwät.

³Jii häna'c-hajxy näje'le, wiing hajxy jajnähiх'өy. Cabä hoguiapxiä homiädia'agy hajxy wyiinju'өwa'añ neby hajxy nyajnähiх'өyyäm ja'a Wiindsön Jesucristocөxpä coo ja'a hoybä weenbä hajxy jaduhñ nbäatäm. ⁴Ja'a häna'c-hajxy jaduhñ wiing jajnähiх'өöbiä, jaanč tehñ ñiguiumáayyap hajxy jaduhñ cooc tyijy hajxy jiaanč tehñ jiaty, cooc tyijy hajxy jiaanč tehñ ñaju'өy. Pero cab hajxy tii ñä'ägädä jaty, cab hajxy tii ñä'ägädä naju'өy. Hanaxiä mädia'agy hajxy yajtsip yajma'ad'өy, ja'a ca'a tsoobaatpä. Coo hajxy jaduhñ jiatc'өy, paady hajxy cөxiä wiinä jajcapxi'өy, paady hajxy miänähöön'өy, paady hajxy haxөөгjaty ñiñäma'ayii. ⁵Coo hajxy jaduhñ jiaanč tehñ chiptsocy, paady hajxy jiaanč tehñ ñibiamädsib'өyii. Jaanč tehñ yhaxөөгä wyiinmahñdyhajxy. Tөө ja'a tөyhajt hajxy ñajtshixөөñä. Wi'i yajmäjuyaamb hajxy, paady hajxy ñibiäda'agyii cooc tyijy ja'a Diosmädia'agy hajxy

miäbøcy, cooc tyijy hajxy
 yajnähiçø'oy. Naçiä häna'c
 jaduñmä mdehm̄ piuhwá'adsät.
⁶Coo ja'a Diosmädia'agy hajxy
 hoy nmäbøjcämät, jaduñnä
 hoyhajtä weenhajt hajxy mõj may
 nbáatämät, jaduñ hajxy jootcujc
 nhíjtämät. ⁷Haa ca'a, coo hajxy
 yaa nmiin ngáhwäm hädaa yaabä
 naaxwiin, cab hajxy tii nmämiin
 nmägáhwäm. Nähwa'ads hajxy
 nmaaxhuunghájtäm. Jaaná
 jaduñduhm̄bä, coo hajxy nho'c
 ndägóoyyäm, mänit hajxy çøjx
 nhøxhó'cäm tijaty hajxy yaa
 nmøødhájtäm hädaa yaabä
 naaxwiin. Cab hajxy tii hoy
 nmädsoonáañäm. Tehm̄ tiøyhajt
 jaduñ. ⁸Hoorä, coo wit tucxy hajxy
 nmøødhájtäm, coo cay hu'ugy hajxy
 nmøødhájtäm, paady hajxy jootcujc
 tsøc híjtäm. ⁹Pero jii häna'c-hajxy
 näje'e, jaduñ hajxy wyl'i miäna'añ
 coo hajxy miäyøøjø'owa'añ.
 Paadiä haxøøgwiinmahñdy
 hajxy pianøcxa'añ. Jaduñ hajxy
 haxøøgtuum nøcxy quia'awa'añ.
 Je'e hajxy yhøxtaaby mädyii jaduñ
 ca'a howyiinmahñdy. Je'e hajxy
 jaduñ quiumädozáannäp. ¹⁰Jiyyä
 haxøøgpä ca'a hoybä ñä'ägädä
 tsohnda'agy coo jäya'ayhajxy
 wyl'i xiädø'øñhadsocy, møød coo
 hajxy wyl'i wyiinduc-haty. Paadiä
 Diosmädia'agy hajxy näje'e tøø
 ñajtshixø'oy. Paady hajxy jiaanch
 teh̄m̄ jootmayhajnä.

¹¹Pero miich, coo miichä Dios
 xquiuguexyhaty, cabä haxøøgpä
 ca'a hoybä mädyii mgudiün
 mguñaxät. Ja'a hoybä weenbä
 jaduñ mgudiünäp. Ja'a Dios
 mwiingudsähgø'owäp. Mmäbøjcäbä

miädia'agy. Mmädsoc mba'häyowäp.
 Mmee'xtügäp hoy mja tsaachpøcy.
 Mee'xxieemy mhäna'c-hädät.

¹²Hahixøøby coo ja'a Diosmädia'agy
 hamuumdu'ljoot mmäbøgät, jaduñnä
 Dios xyagjyghädät çøjxta'axiøø
 neby je'e juyghatiän. Mänit miichä
 Dios jaduñ xyajnähdijy coo jaduñ
 mjyghädät çøjxta'axiøø mänaa
 miich nnägapxiän cu'ugwiinduum
 coo ja'a Diosmädia'agy tøø
 mmäbøcy. ¹³⁻¹⁴Chaads miich
 nwiingapx njøjcaxø'oy coo ja'a
 Dioscuhdajt tehngajnä mjaac
 cudiün mjaac cuñaxät, møød
 coo mga'a yajtägätsät, jaduñnä
 Dioscuhdajt quia'a nänømøøjät
 haxøøg, høxtä coonä yhabaadät
 coo ja'a Wiindsøn Jesucristo yaa
 quiädaactägatsa'añ hädaa yaabä
 naaxwiin. Ja'a Dios hajxy jaduñ
 xyhíjxäm møødä Jesucristo. Ja'a
 Diósädsä juyghajt mooby hoy piønä
 hoy tyijjä. Haa ja'a Jesucristo, coo
 hänäjty jim̄ tøø yajmechii maa
 ja'a Poncio Pilato wyiinduumän,
 mänit ñägapxy coogä Dios tøyhajt
 yHuunghadyii. ¹⁵Ja'a Dios jaduñ
 yaghabaadaamb mänaa ja'a
 Jesucristo yaa quiädaactägatsa'añ
 hädaa yaabä naaxwiin. Jaanch
 teh̄m̄ jootcujcä Dios. Nidiuhm̄ tiuñ
 Wiindsøn. Nidiuhm̄ miähane'emy.
 Ni pøn jaduñ quia'a mäbaady.
 Nägøxiä gobiernähajxy yhane'emyii
 møødä reyhajxy. ¹⁶Hoy miänaajä
 Dios yhity. Jim̄ maa ja'a Dios
 yhitiän, jaanch teh̄m̄ miøc jim̄
 yhajjy. Paady hajxy jim̄ hoy nga'a
 wiingumedsøoyyäm. Tsøc hajxy hoy
 miänaajä Wiindsønghájtäm.

¹⁷Pønjaty mäyøø hädaa
 yaabä naaxwiin, jaduñ miich

mwiingapx mjøjcapxó'owät coo hajxy quia'a niguiumayóøjät, mөөд coo ja'a Dios hajxy yhajodhädät. Møj jaančhä Dios. Cөxiä wiinä hajxy xmióoyyäm, jaduһn hajxy jootcujc nhíjtäm. Pero cabä mäyөөjäya'ayä xädø'øn hajxy yhadsógät. Hix cөjxp tägooby ja'a hajxy miämäyөөhajpiä.

¹⁸Jaduhñä mäyөөdөjc mwiingapx mjøjcapxó'owät coo hojioot hajxy jiaančh tehñ miөөdhädät. Weenä häyoobädөjc hajxy piuhbety. Cab hajxy wyiinduc-hädät. ¹⁹Coo hajxy jaduһn yaa yhojiäya'ayhadät hädaa yaabä naaxwiin, mänitä hoyhajtä weenhajt hajxy mөj may piáadät Dioswiinduum. Y jaduһn hajxy

cөjxta'axiөө yagjugyhadóøjät nebiä Dios jiugyhatiän.

²⁰⁻²¹Timoteo, coo miičhä Dios tөө xyajnähdijy coo ja'a miädia'agy myajwá'xät, paady hamuumdu'joot mgudiúnät, paady jaduһn mnäwá'anät. Hix, tөө jäya'ayä Diosmädia'agy hajxy näje'e ñajtshixø'oy. Wiingmädia'agy hajxy tөө piadu'uböcy cooc tyijy miaas yajxonä. Pero cabä mädia'agy jaduһmbä tiöyyä. Cab jaduһn choobaady. Nä'ä nägoobä yhөһnda'agy ja'a Dioscөxpä. Cabä hөһnda'agymiädia'agy jaduһmbä mmөjpadá'agät.

Ween miičhä Dios ja'a tsooctä mayhajt xtiuunä. Amén.